

Date – 31/01/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- Larsap General (Retd) Vijay Kumar Singh hovin nimin khan 'Ek Bharat Shreshtha Bharat' hnuaiah Manipur, Meghalaya, Tripura, Uttar Pradesh bakah Dadra and Nagar Haveli & Daman and Diu-te foundation day lawm a ni.
- RD Minister Prof. Lalnilawman Ropuiliani Women Farmer Producer Company Limited member te tharchhuah Mizo Hmarchate Metric Ton 5 chu MIFCO Complex, Chhingchip atangin a vailiam.
- Union Finance Minister Nirmala Sitharaman-i chuan naktuk hian Union Budget 2026-27 Lok Sabha ah a pharh dawn.
- External Affairs Minister Dr.Jaishankar-a chuan nimin khan Libya Foreign Minister Eltaher Elbaour hmuin ram pahnih inkar a ssawipui.



GOVERNOR

Mizoram puala din NCC Group Headquarters Aizawl chu nimin khan Larsap General (Retd) Dr VK Singh-a'n a hawng.

A hawwna MZU Auditorium-a neihah thusawiin, Larsap chuan sipaia luh tumte tan National Cadet Corps, NCC-a tel tluka tha a awm lo a ti a, NCC Group HQ Aizawl hawn fel tak chuan Mizoram thalaite zingah NCC hmalakna a thanlen zual tir dawn tih sawiin, Republic Day parade-ah NCC Band Mizoram te'n fak an hlawh thin thu sawiin, hmasawn zel tum turin a chah.

Adventure Tourism tih hmasawn kawnga Mizoram sawrkar hmalakna fakawm tiin, NCC cadet-te pawh hetiang lama an tel tam zel a beisei thu a sawi a. Kum 1964 atang khan NCC chuan Mizoramah hmalakna leh hlawhtlinna chhuanawm tak tak a nei a, inthununna leh hun remchang thalaite siam sak kawngah NCC aia thawh hlawk thalaite telna pawl dang a awm bik lo a ti a, mihring puitling leh chhawrtlak chher chhuah kawngah NCC chuan a thawh hlawk hle tih a sawi bawk.

NCC hi Mizoramah kum 1964 khan din a ni a, tun dinhmunah batallion 4- Aizawlah battalion pathum te awm mekin, Lungleiah battalion pakhat a awm bawk.

Mizorama NCC batallion hrang hrangte chu Silchar Headquarters hnuai a awm thin a. Tunah chuan Brigadier thutchilhin Aizawl-ah ngei Group Headquarters Mizoramin a nei tawh dawn a ni.



RD MINISTER

Rural Development & Administration Department Minister Prof. Lalnilawman Mizoram State Rural Livelihoods Mission (MzSRLM) hnuai din Ropuiliani Women Farmer Producer Company Limited member te tharchhuah Mizo Hmarchate Metric Ton 5 chu MIFCO Complex, Chhingchip atangin a vailiam.

Prof. Lalnilawma chuan Ropuiliani Women Farmer Producer Company-te hmalakna chu fakawm a tih thu a sawi a. Mizo hmarcha bik hi ram pawnah kan thawn chhuak tawh thin a, Mizo hmarcha a nihna a lang tawh thin lova chuang chuan Mizoram atanga thawnchhuah a ni tih lantir zel anih tawh thu sawiin Mizo hminga a kal tawh thu a sawi a ni. Thlai thar hralhna chungchangah harsatna neuh neuh a awm thin chu MzSRLM leh sawrkar atanga te leh company atangte pawhin theitawp an chhuah zel tur thu a sawi bawk a ni.

Ropuiliani Women Farmer Producer Company Limited hi Mizoram State Rural Livelihoods Mission (MzSRLM) hnuai sub-scheme pakhat Mahila Kisan Sashaktikaran Pariyojana (MKSP) Value Chain project kaltlanga din a ni. He Company kaltlang hian MzSRLM hnuai Self Help Group member hmeichhiate chu shareholder a ziahluh an ni, Producer Company kaltlang hian Sawhthing, Mizo Hmarcha leh Aieng hralhna mumal zawk an neih theih nan hmalakna kalpui mek a ni a. He hmalakna kaltlang hian Mizoram chhunga District 7 -Champhai, Khawzawl, Saitual, Aizawl, Serchhip, Mamit, Kolasib District leh R.D Block 16 tuamchhuah vek niin, Board of Director mi 5 leh first subscriber mi 12 an awm mek bawk. He project huamchhunga khaw 154 chuang atangin shareholder mi 6346 an inziak lut tawh a, he Company enkawl tur hian staff mi 9 awm mekin, Technical Support Agency hi Foundation for Development of Rural Value Chains (FDRVC) te an ni.



PEACE CITY

UD&PA leh AH&Vety Dept hotuten nimin khan Thenzawl an tlawh a. Neihloh khaw hmun sawna tur te, Thenzawl Peace City Greenfield hmun tur te, AH&Vety Department hmun thar tur te an enho a ni.

Thenzawl Golf Course a Programme buatsaihah Thenzawl Peace City Greenfield chungchanga an ruahmanna te chu an Consultant rawih mek IPE Global ten an sawifiah a. Peace City Greenfield pumpui atan hian sum ruahman chu cheng vaibelchhe 500 vel a ni a. UD&PA Department lam hian SASCI 2026 chhunga Peace City project thun tur chinte ngaihvenin, SASCI bik atang hian Peace City project atan cheng vaibelchhe 150 vel hmuh theih an inbeisei a ni.

Greenfield atana hmunhman an hman tur hi tuna AH&Vety Dipui hmun leh Thenzawl Golf Course ram huam chin thenkhat te a tel a. Chuvaung chuan UD&PA Department, AH&Vety Department leh Tourism Department te nen sawihona neih niin vawiin hian heng Department aiawh te nen hian a hmunhman te enhoin inrawnkhawmna pawimawh neih a ni.

AH&Vety Dilpui ram hi ran chaw chinna leh siamna hmun atana hman mek a ni a. Peace City hmunhma atana hman tum a lo nih tak avangin Fodder chinna hmun dang ngaihtuah a lo ngai ta a. Chuvangin, Neihloh khaw insawna tur hmun hma hi thuneitute hian an tlawh a, fodder chinna hmun atana hman tlak a nih leh nih loh an enho a ni.

UD&PA Secretary Pu Lalmalsawma Pachuau, AH&Vety Secretary Pu C. Lalsangliana, Serchhip DC Pu Paul L Khuma, UD&PA Director, AH&Vety Director, Serchhip Additional DC, Thenzawl SDO Civil, Tourism aiawhte leh mi pawimawh dang te an tel a ni.

<><><>

PWD

Public Works Department (PWD) Minister Pu Vanlalhlana PWD hnathawhte mipuiin an hriat theih nan publicity-ah tan lak lehzual a ngai a ti.

PWD hnuaiia hna hrang hrang thlirletna thutkhawm nimina Aizawl Engineer-in-Chief Conference Hall-ah neih ah he thu hi sawiin, Pu Vanlalhlana chuan Sawrkar hnathawh chu rawngbawlina a ni a, mipuiten hamthatna an dawn theih nana dik taka hna an thawh chu an tih makmawh a ni, a ti a. Kalkhawmte chu an dinhmun a te emaw a lian emaw, an hna chu rawngbawlina-ah ngaia, hmun nuam emaw hmun hrehawmah pawh phur taka an mawhphurhna hlen chhuak zel turin a fuih a. An kawng siamte a tlo theih zawk nan a enkawl dan mipui leh tlawmngai pawlte zirtir that a pawimawh thu a sawi bawh a ni.

He hun hmanpuitu Adviser to CM Pu Ginzalala pawhin thu sawiin, sawrkar hnathawhte file tikalmuangtu leh tithuanawp theitu kan nih avangin tun aia tan lehzual a tul thu leh mipuite tana dawr nuam zawk kan nih a ngaih thu a sawi a. Engineer-te chu technical lamah pawh intahhriam a pawimawh thu a sawi a. Hun hmandik hi hmasawna atana thil pawimawh tak a nih avangin tun aia hun hmandik kawngah tan kan lak lehzual a ngai, a ti a. Ram changkang kan nih theih nan hmasawna ruhrel hrang hrang din a ngai a, ramngaw leh nungchate humhalh chungin heng hmasawna hna pawimawh tak takte hi kalpui zel tur a nih thu a sawi.

Thusawitu dang MLA Pu T. Lalhlimpuia chuan kumtin fur laia leimin avanga harsatna thleng thin tihziaawm nan hmalak dan tur ngaihtuah lawk thin a pawimawh thu a sawi a. Engineer-te chu Department hmel lanna an nih avangin, sik leh sa leh fur leh thal atan tih tur hmasa leh hnunung hriat a, hna pawimawh zualte thliar thiama, inrelbawlina tha neih a tul thu a sawi.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

EK BHARAT SHRESTHA BHARAT

Larsap General (Retd) Vijay Kumar Singh hovin nimin khan 'Ek Bharat Shreshtha Bharat' hmalakna hnuaiah Manipur, Meghalaya, Tripura, Uttar Pradesh bakah Dadra and Nagar Haveli & Daman and Diu-te foundation day lawmna, Lok Bhavan Durbar Hall-ah buatsaih a ni.

Larsap chuan Prime Minister hmalaknaa kalpui 'Ek Bharat Shreshtha Bharat' chuan India ram hnam ziarang Hausa tak chawilar a tum tih sawiin, kalna apiangah hnam ziarang leh nunphungte midang hmuh theiha phochhuah a, midang hnam ziarang leh nunphungte inzir tawn hian inhriatpawhtawanna leh inunauna a siam a ni", a ti a. India ram chu ram ropui leh zau tak a nih avangin a ram mipui zinga tam zawkin midangte hnam ziarang leh nunphung an hriat chian loh fo thin thu sawiin, inpumkhat turin midangte hnam ziarang leh nunphung kan zaha kan hlut thiam a pawimawh hle a ni, a ti.

Manipur Larsap Pu Ajay Kumar Bhalla, Meghalaya Larsap Pu C.H. Vijayashankar, Tripura Larsap Pu Indra Sena Reddy Nallu leh Uttar Pradesh Larsap Pi Anandiben Patel te thuchah bakah heng state leh UT te chanchin tarlanna video thlir ho a ni a. Manipur aiawhin Dr. Ch. Sarakham Aimol, Assoc. Prof., RIPANS leh Tripura aiawhin Dr. Analisha Debbarma, Asst. Prof., CVSc& AH te'n an state chanchin tawi an sawi a. RIPANS leh Govt. Johnson College zirlaite'n hnam lam an entir a ni.

Manipur, Meghalaya leh Tripura-te hi January ni 21, 1972 khan North Eastern Region (Re-organisation) Act, 1971 hmangin State puitlina hlankai an ni a. Uttar Pradesh hi January ni 24, 1950 khan state-a puan niin, Union Territory pahnih Dadra & Nagar Haveli leh Daman & Diu-te hi January ni 26, 2020 khan Union Territory pakhata chhunfin an ni.

Ek Bharat Shreshtha Bharat programme hian India rama State leh UT hrang hranga cheng hnam hrang hrang, hnam ziarang leh nunphung inang lo tak takte inkara inpawhna tha zawk siam leh an inkara inhriatthiam tawanna nasa zawk siam a tum a. Ek Bharat Shreshtha Bharat programme kaltlang hian India rama State leh UT hrang hrangte foundation day lawmna chu Lok Bhavan, Mizoramah Larsap kaihruaiin June, 2023 atang khan buatsaih tan a ni.



NATIONAL VOTERS DAY PADYATRA/RALLY

Mizoram Chief Electoral Officer Dr. Lalrozama'n zirlaite chu ram rorelna leh vote thlak ngai pawimawh turin a chah.

Nimin khan National Voters' Day pualin Mera Youva Bharat Mizoram, Government T Romana College, leh Sport Authority of India (SAI) tangho buatsaih National Voters Day Padyatra /Rally chu Govt. T.Romana College-ah neih a ni a. He hun hmanpuitu CEO Dr. Lalrozama chuan thusawiin, zirlai kalkhawmte chu ram rorelna ngai pawimawh turin a chah a, ram roreltute chu mipui te'n vote hmanga an thlan a nih avangin vote thlak chu ram kalsiam reltu pawimawh tak a ni a ti a, mipuite ei leh in, him leh dam leh hriselna thlenga nghawng nei a nih avangin vote thlak chu mipui rorelna- democracy laimu a nih thu a sawi bawk a ni.

Mera Youva Bharat Mizoram Director Pi Mercy Selate pawhin thu sawiin, National Voters Day Padyatra an tih chhan chu thalaite an hrisel loh chuan ramin hruaitu tha a nei thei dawn lova, an hrisel theih nan cycle hmang emaw ke a kal tam tura fuihna a ni a ti a, thalaiten hriselna an ngaihpawimawh chu My Bharat, My Vote programme in a tum ber a nih thu sawiin, thalaite chuan India inrelbawlnaah mawhphurhna sang tak an neih avangin ram neitu thinlung pu chungin vote thlak thin turin a chah a, ei leh in fimkhur a, hriselna ngaipawimawh a, ruihtheihthila fihlim turin a chah bawk a ni.

Byte- Mera Youv Bharat Mizoram Director Pi Mercy Selate

Voters' Day puala hun hmannaah hian vote nei tharte lawmpuina hun hman a ni a, kalkhawmte chuan vote thlak ngai pawimawh tura intiamna leh mipui chanvo a nih thu an sawi rual a ni.

Lawngtlaiah pawh My Bharat (NYK) bul tumin National Voter's day chu Govt. Lawngtlai College ah hman ani. Election Officer Pu Collin Hlychho an hmanpuiin zirlai vote nei thar te lawmpuina thil pek hlannin, vote vawikhatmah la thlak lo te fuihin, vote nei zawng zawng te vote thlak ngaipawimawh turin a chah bawk.

<><><>

UNION BUDGET

Union Finance Minister Nirmala Sitharaman-i chuan naktuk hian Union Budget 2026-27 Lok Sabha ah a pharh dawn a. Lok Sabha-a budget pharh zawhah hian Rajya Sabha-ah dawhkanah pharh chhonzawm a ni ang. Tun tum hi kum 2019-a a office a luah hnua Pi Sitharaman-in a zawna Union Budget a pharh tum kuana tur a ni a. Narendra Modia sawrkar term thumnaa budget pathumna tur a ni ang.

Budget kimchang hi Mobile App leh website ah en theihin dah a ni dawn a. Union Budget pharh zawh hian Union Finance Minister Sitharamani hian ramchhung hmun hrang hrang atanga kalkhawm college zirlaite nen hun an hmang dawn a ni.

<><><>

UNION HOME MINISTER

Union Home Minister Amit Shah chaun nimin khan Assam ah hmasawna hna cheng vaibelchhe 1700 hu a hawng. Vawiina hawn zingah hian Dibrugah-a legislative Assembly complex pawh a tel a. Thusawiin Pu Shaha chuan India-European Union ten Free Trade Agreement an ziah chuan Assam atanga Europe rama thingpui fe thawmchhuah a ti pung dawn a ti a. Assam in tuilian a tawrh thin chungchangah sawrkar laipui chuan tuilian awm tawhlohna state ah Assam chu siam an tum a ti a. Assembly inthlan lo awm turah Assam mipuite chu BJP vote theuh turin a sawm a ni

<><><>

EAM

External Affairs Minister Dr.Jaishankar-a chuan nimin khan Libya Foreign Minister Eltaher Elbaour hmuin ram pahnih inkar a ssawipui. Hruaitu pahnihte hian sumdawna, hmasawna ruhrel, leh energy lama thawhdunna hrang hrang an sawidun a. Dr.Jaishankara hian Social Media lama a tarlan danin Pu Elbadour hian Libya dinhmun tawn mek a hrilhfiyah a. Idnia in remna leh muanna a wm theihna tura inbiakna leh thawhhona tha a sawi pawh a ngai pawimawh hle tih a sawi a ni

<><><>